

Ingoa: _____ Rangi: ____/____/____

Hōkioi

Nā Peti Nohotima

Whatukura

I neherā anō, noho ai tētahi manu i ngā tihi o Tararua. He manu tino mīharo tēnei nā te mea, i te kaha tiketike o tana rere, kore rawa e kitea atu. Ko te pakipaki noa iho o ōna parihau ka rangona atu, me tana tangi hoki. Ko te ingoa o te manu nei, ko Hōkioi.

Nā i tētahi rangi, ka kī atu a Kāhu ki a Hōkioi, “Hōkioi, ko koe tētahi manu koretake!” Ka tīoro atu te hōkioi ki te kāhu, “Kāhu whakahīhī, ko wai koe ki te whiuwhiu kōrero mai ki a au?” Ka kī atu a Kāhu, “Āe hoki, haramai kia kite tāua ko wai o tāua ka mau kapua hai pūeru!” Kotahi noa iho te whakaaro o Hōkioi kia kereū rawa i a ia a Kāhu.

Aua rā ki a Kāhu, nō te roanga o te rere ka koirā whakararo ia. Ehara, kua kite tonu iho e mura ana te rarauwhe. “Aiii,” te whakaaro o Kāhu. “Kāore e kore ka puta mai ngā kiore me ngā punua manu i te wera!” Wareware atu tā rāua kaupapa. Ko te mea nui tonu ki a Kāhu ko tana puku.

Kātahi a Hōkioi ka hāparangi mai, “Wii, Kāhu wahanui, ko koe rānei te waha papā!” I te kaha koa o Hōkioi kua kereū i a ia a Kāhu, haruru ana tana whakamihī ki a ia anō, “Hōkioi! Hōkioi! Hōkioi!” Ā ngaro atu ana ki te rangi. Mai i tērā wā korekore ana e kitea a Hōkioi.

E ai anō ki te kōrero, i te wā e pawe haere ana te tīpuna nei a Hau i te whenua, ka rongō ia i te tangi a te Hōkioi me te haruru hoki o ngā parihau. Ka tapaina e ia te wāhi i rongō rā ia i te tangi a te manu, ko Hōkioi. Kai roto tēnei i te rohe o Horowhenua, pātata atu ki te moana ki te taha uru o Te Ika-a-Māui. Ko te ingoa e mau ana e karangatia ana mō taua wāhi ko Hōkio.